

ESTATUTOS DO INSTITUTO «JOSÉ CORNIDE» DE ESTUDIOS CORUÑESES





DISPOSICIÓN XERAIS

O Excmo. Concello da Coruña, en sesión plenaria do 3 de xullo de 1964 resolveu crear o *Instituto «José Cornide» de Estudios Coruñeses*, baixo o patrocínio do Excmo. Concello da Coruña.

En aplicación do artigo 124 da lei 7/85 de 2 de abril, Reguladora das Bases do Réxime Local, o citado Instituto configúrase como un órgano especial de administración, sen personalidade xurídica independente do Concello, que se integra na estrutura municipal como un servizo de carácter cultural e de investigación que non implica exercicio de autoridade, desconcentrado, que actúa con amplo marxe de autonomía en canto se refire á actividade cultural, científica e investigadora. Esta actividade será levada a cabo por personalidades relevantes do mundo intelectual, científico, académico, artístico e universitario fortemente vencelladas á Coruña.

Baixo a dependencia orgánica da Alcaldía, que o preside, o Instituto se encardina funcionalmente na Área de Cultura, onde contará con persoal específico ao que poder dirixirse, de forma que a xestión económica e administrativa do Instituto sexa máis eficaz e áxil.

Ao longo destes anos, a realidade demostra a necesidade de perfeccionar os seus Estatutos para un mellor funcionamento do citado Instituto, o que supón a derogación dos vixentes Estatutos de 11 de xaneiro de 1988 e a aprobación duns novos unidos á presente proposta, cuxo texto é o que a continuación se insire.

Art. 1. O Instituto «José Cornide» ten os seguintes fins:

- a. Realizar, publicar, impulsar e coordinar estudos, investigacións e actividades de natureza histórica, xeográfica, socio-económica, literaria,



artística e científico-técnica, prestando especial atención á realidade socio-cultural e científica da cidade, da súa área de influencia e de Galicia.

b. Custodiar, conservar e poñer ao servizo dos investigadores os fondos documentais e bibliográficos procedentes de legados e doazóns cedidos á Institución, con especial atención ao Fondo Salvador de Madariaga.

c. Establecer e manter relacións con universidades, institucións e organismos científicos e culturais —españóis e estranxeiros tanto públicos coma privados— para a realización conxunta de programas e actividades que contribúan ao mellor cumprimento dos seus fins.

Art. 2. O Instituto utiliza como emblema o escudo familiar de D. José Cornide que está na fachada da casa que habitou na Coruña o ilustre polígrafo que dá nome ao Instituto, acompañado da inscrición *Instituto «José Cornide» de Estudios Coruñeses*. Este emblema será usado en medallas, condecoracións, distintivos, publicacións, etc. As medallas levarán no anverso o emblema citado e no reverso o escudo da Coruña.

Art. 3. A sede do Instituto radica na Coruña, na Casa da Cultura «Salvador de Madariaga», na rúa Durán Loriga 10. O Concello poderá cambiar esta ubicación, oído previamente o Plenario do Instituto.

OS MEMBROS DO INSTITUTO

Art. 4. Os membros do Instituto son de tres categorías: de Honra, de Número e Colaboradores. Todos eles son propostos pola Xunta de Goberno e elixidos, mediante votación secreta, polo Plenario do Instituto para a súa ratificación e nomeamento por parte da presidencia.



O seu nomeamento ten carácter vitalicio, agás que presenten a súa renuncia.

Art. 5. Os membros de Honra son elixidos entre as persoas de máxima relevancia social e cultural, e que contribúisen ao enriquecemento e potenciación da Institución.

Art. 6. Os membros de Número son elixidos entre aquelas persoas que destacasen no ámbito da investigación, a divulgación ou o estudo, que teñan obra ou traballos relacionados coa actividade da Institución. O seu número máximo é de 30.

Todo/a Numerario/a electo/a ten a obriga de presentar, dentro do prazo dun ano desde a súa elección (prorrogable en casos xustificados a xuízo da Xunta de Goberno), un traballo escrito de ingreso que versará sobre algún dos temas relacionados cos fins da Institución. Os artistas poderán optar pola entrega dunha obra orixinal existindo, neste caso, un único discurso que será o do Numerario/a encargado de facer a biografía de quen ingresa.

O discurso do membro electo, previamente presentado á Xunta de Goberno, será obxecto de contestación por parte doutro Numerario/a que se designe, quen deberá presentar a súa resposta no prazo de tres meses a partir da entrega do primeiro. Os dous discursos serán lidos en sesións públicas e solemnes, e publicados.

Art. 7. Os membros Colaboradores poderán utilizar os medios de investigación do Instituto e asistir ás reunións das Seccións ás que pertencen. O seu número máximo é de 30.



OS ÓRGANOS DE GOBERNO

Art. 8. Os órganos de goberno do Instituto «José Cornide» son: o Plenario do Instituto e a Xunta de Goberno.

O PLENARIO DO INSTITUTO

Art. 9. O Plenario do Instituto está formado polo presidente/a, cargo que ostenta a persoa que desempeña a Alcaldía da Coruña; o vicepresidente/a, que será o concelleiro/a que teña ao seu cargo a área de Cultura; os membros Numerarios e os de Honra, estes últimos con voz pero sen voto. Actuará como secretario/a quen exerza o cargo de director/a na Xunta de Goberno, que levantará acta do tratado e acordado.

Art. 10. As atribucións do Plenario do Instituto son:

- a. Elixir ao director/a.
- b. Elixir e nomear os membros de Honra, de Número e Colaboradores.
- c. Aprobar as contas de ingresos e gastos ao remate de cada exercicio presentadas pola Xunta de Goberno, así como aos orzamentos previstos de cada exercicio.
- d. Aprobar a memoria anual de actividades e o plan de actividades para o seguinte exercicio.
- e. Propoñer as reformas do Estatuto.
- f. Propoñer a disolución do Instituto.



g. Calquera outra misión referida ao funcionamento do Instituto a proposta da Xunta de Goberno.

Art. 11. O Plenario do Instituto reunirse con carácter ordinario unha vez ao ano e cantas extraordinarias sexan precisas cando a propoña a Xunta de Goberno ou un terzo dos Numerarios mediante escrito no que expoñan os motivos da mesma e os temas a tratar. Neste caso, o Instituto será convocado no prazo de quince días contados a partir da entrada da petición no Instituto.

Art. 12. O Plenario do Instituto quedará constituído en primeira convocatoria cando concorran maioría dos seus membros, ademais do presidente/a e secretario/a. Na segunda convocatoria, que se celebrará media hora despois da primeira, será suficiente coa presenza do presidente/a, o secretario/a e un terzo dos seus membros.

Art. 13. Os acordos serán adoptados pola maioría simple de votos. As votacións poderán ser secretas.

Art. 14. Son competencias da presidencia do Instituto:

- a. Convocar, presidir, suspender e levantar as sesións do Plenario do Instituto, así como dirixir as súas deliberacións e resolver os posibles empates co seu voto de calidade.
- b. Ordenar a execución dos acordos adoptados polos órganos colexiados de goberno.
- c. Asinar no nomeamento dos membros de Honra, de Número e Colaboradores e dar posesión dos mesmos.
- d. Dar o visto e prace ás actas das sesións e aos balances e orzamentos do Instituto.



e. Representar ao Instituto en todos os actos públicos e nas relacións con outros organismos.

f. Calquera outra que non estean atribuídas expresamente á Xunta de Goberno ou á Dirección do Instituto.

En caso de ausencia será substituída pola vicepresidencia.

A XUNTA DE GOBERNO

Art. 15. A Xunta de Goberno está formada polo presidente/a do Instituto, o vicepresidente, o director/a e catro membros de Número, estes últimos elixidos para un período de catro anos. Todos os cargos da Xunta de Goberno son gratuítos.

Reunirase mensualmente en sesión ordinaria, e en extraordinaria cantas veces sexa preciso, convocadas pola presidencia.

Art. 16. Os catro membros de Número desempeñarán as seguintes funcións:

- Secretario/a-conservador/a.
- Tesoureiro/a.
- Vogal de publicacións.
- Vogal de Actos e Extensión Cultural.

Art. 17. As atribucións da Xunta de Goberno son as seguintes:

- a. Presentar ao Plenario do Instituto os plans de traballo.



- b. Confeccionar o orzamento anual e as contas de cada exercicio.
- c. Redactar a memoria anual e establecer as previsións para o seguinte exercicio.
- d. Coordinar as publicacións da Institución, fixando os traballos que se vaian a publicar.
- e. Determinar os traballos do persoal do Instituto «José Cornide».
- f. Manter relacións con outras institucións.
- g. Organizar las actividades e actos da Institución.
- h. Proponer ao Plenario do Instituto a elección de novos membros.
- i. Proponer ao Plenario do Instituto a adscripción dos membros de Número e Colaboradores ás seccións.

O DIRECTOR/A

Art. 18. O director/a será elixido/a polo Plenario do Instituto entre os seus membros Numerarios. Desempeñará as seguintes funcións:

- a. Proponer os membros da Xunta de Goberno entre os Numerarios.
- b. Cumprir e facer cumprir os Estatutos e os acordos dos órganos colexiados.
- c. Coordinar o funcionamento das seccións do Instituto e dar conta das actuacións das mesmas podendo, se o considera preciso, reunir os seus presidentes.



- d. Proponer ao Plenario do Instituto as cuestións que lle competa resolver.
- f. Coordinar os aspectos que afecten á vida cultural da Institución.
- g. Encauzar as discusións e dirimir nas votacións con voto de calidade, cando non asistan a presidencia nin a vicepresidencia.
- h. Actuar como secretario/a do Plenario do Instituto.

En caso de ausencia, enfermidade ou outras causas, será substituído/a polo membro Numerario de maior idade.

O SECRETARIO/A-CONSERVADOR/A

Art. 19. Correspóndelle as seguintes funcións:

- a. Actuar como secretario/a da Xunta de Goberno, levantando actas e expedindo as certificacións necesarias.
- b. Velar e custodiar os documentos da Institución, os libros de actas, diplomas, premios, obxectos artísticos e históricos e todo tipo de documentos depositados na Institución.
- c. Controlar o tratamento técnico dos fondos documentais e bibliográficos do Instituto «José Cornide».

En caso de ausencia, enfermidade ou outras causas, será substituído polo membro Numerario de menor idade.



O TESOUREIRO/A

Art. 20. Correspóndelle as seguintes funcións:

- a. Confeccionar o orzamento anual para o seguinte exercicio.
- b. Controlar ingresos e gastos do Instituto.
- c. Dar conta do balance de gastos á Xunta de Goberno.

VOGAL DE PUBLICACIÓNS

Art. 21. Será quen se encargue de propoñer e coordinar as publicacións da Institución, tanto as de carácter periódico —a Revista anual do Instituto— como as puntuais que xurdan a proposta da Xunta de Goberno.

VOGAL DE ACTOS E EXTENSIÓN CULTURAL

Art. 22. Terá como misión presentar e coordinar todo tipo de actos de carácter cultural programados pola Xunta de Goberno.

AS SECCIÓNS DO INSTITUTO

Art. 23. As seccións deben ser os principais axentes de actividade do Instituto e delas formarán parte os membros de Honra, de Número e os Colaboradores. Son as seguintes:

- Sección de Historia e Arquivos.



-Sección de Arte, Patrimonio e Literatura.

-Sección de Ciencias Sociais, Económicas e Xurídicas.

-Sección de Ciencias Físicas, Naturais e da Saúde.

Art. 24. En todas as seccións haberá un coordinador/a designado pola Xunta de Goberno, a proposta da sección respectiva, que se encargará de propoñer e organizar os traballos dos seus membros.

Art. 25. A proposta da Xunta de Goberno poderán crearse Comisións Científicas interdisciplinares para realizar estudos dese carácter que poderán contar con colaboradores externos puntuais.

O PERSOAL DO INSTITUTO

Art. 26. O Concello da Coruña proveerá ao Instituto «José Cornide» do persoal necesario para a realización dos seus fins. Este persoal municipal realizará a súa actividade de forma coordinada coa Dirección e a Secretaría do Instituto. Para o seu correcto funcionamento precisase, como mínimo:

- a. Un coordinador/a de xestión.
- b. Un técnico/a de arquivos.
- c. Un funcionario/a auxiliar administrativo



O RÉXIME ECONÓMICO

Art. 27. As fontes de financiamento son as achegas proporcionadas polo Concello da Coruña incluídas no seu orzamento ordinario.

Art. 28. A contabilidade do Instituto estará controlada e fiscalizada pola Intervención municipal.

DISOLUCIÓN DO INSTITUTO

Art. 29. Acordada a disolución do Instituto «José Cornide», todo o patrimonio do mesmo será entregado ao Concello, agás aquelas doazóns ou legados nos que os respectivos doadores especificasen por escrito, no momento da entrega, outro destino, caso do Fondo Salvador de Madariaga.

Art. 30. Para a operación de liquidación nomearase unha comisión formada por seis membros, tres nomeados polo Concello da Coruña e outros tres pola Xunta de Goberno. Estará presidida por un dos representantes do Concello, que resolverá co seu voto de calidade calquera diferenza que se presente.

DISPOSICIÓN FINAL

Art. 31. A Xunta de Goberno do Instituto «José Cornide» ou un terzo dos seus membros Numerarios poderá solicitar a modificación dos presentes Estatutos, que deberán ser aprobados polo Pleno do Concello da Coruña.



Instituto de Estudios Coruñeses.

José Cornide



Concello da Coruña